

施愚山全集

第一函
五十五册

施愚山先生學餘詩集卷之二十九

五言律

閩南客舍

海畔正搖落烽烟還是非客愁隨月滿鄉夢逐雲歸近市諳蠻語憑人授客衣昨來經雨數蟲響逼宵扉

閩還至青湖

過嶺見山雪始知天更寒客多爭竹艇歸急便江灘亂壓書籤折頻開藥裹殘蘭溪問美酒一酌倘加餐

曉發蘭溪

萬戶江城上沙烟曙色分數峰明霽雪一棹下寒雲鴻鵠朝何往鷓鴣日幾羣舊傳三洞好仙路恨空聞

贈項嶠雪

駕湖遊造次相識遽難忘官興陶彭澤家園顧辟疆尊罍從野飲步履到僧房愁見分襟處孤舟正雪霜

蔣大鴻重至宛陵即送其還山陰

大雅如君少風流衆所歸相看雙髻改誰解寸心違吳越皆鄉土行藏共釣磯扁舟須就汝同調未應稀

雪中種竹和鄭次公水部

纔見梅花放重移竹數竿比鄰分種近凍土著根難影入空庭白清添滿座寒醉來披鶴氅仔細向君看

嘉卿至自清江

夜雨清江漲江門得故人開顏客病減對酒柳條春道合艱虞日天留肥遯身何年同採藥不躡市頭塵

中洲寺所江

異香沿水發清影到門深何代黃楊樹孤洲翠竹林烟雲偏法界鷗鷺共禪心落日滄江客悠然倚杖吟

送龍臚先宰遵化

才譽南金重分符古北平嚴城切畿輔茂宰易聲名土沃屯兵在官勞策馬行溫

泉清可愛正好濯塵纓

半山菴

杪秋復新霽草木賸春芳竹裏改僧徑松間添客房園蔬一畝足筐果四時藏纔
是重陽後東籬菊未黃

遙和王阮亭客部同爾止宿牛首一鐙樓見懷

建業六朝寺春卿足勝遊幽人同永夕清嘯復高樓月與松林白江涵天闕秋遙
知相憶處應聽斷猿愁

答王客部寄題就亭

兩年去官舍常憶小亭幽復枉古人贈含情感昔遊半庭陰古柏一步接滄洲不
及同登望誰憐楓樹秋

同諸公集玉山寺和陳遽人

薄遊期屢悞不易是尋山詞賦看時輩林峰慰老顏息機遲媿拙散病早知閒向
夕高雲合留人未遣懷

二

幾年耆舊闊幽事得僧同對客把詩卷看雲穿竹叢亂峰歸鳥外紅樹碧波中吾自陶潛輩千秋憶遠公

過顧與治舊居今為鄭汝器宅

故人棲隱處不到十年餘問宅更三主寒梅覆一廬亭留醒酒石壁牘換鴛書稍喜辟疆地猶為鄭谷居

偶書筆工扇

諸葛鼠鬚筆宣州風擅名到今存舊法許爾得孤行傳可專毛穎功優佐墨卿中書吾老嬾慚負故人情

夜過阮懷

永夜攤書帙燈明敬竹關共看溪上月正照城頭山貰酒比鄰得移家何處閒論詩成底事相接一開顏

雪夜

積雪荒城暮堅氷欲上鬚風鐙疏影亂寒雁一聲無遺事難辭老安身得守愚扁舟藏凍浦何處問江湖

半公遊黃山

真僧愛名嶽春入早支筇獨去尋深寺幽居定幾峰雲來見滄海雪淨聞清鐘猶恐層冰在巉巖細路封

李遷于以病還歙

冬春同病久忍淚送君歸藥裹行隨路山村舊掩扉寬心遲白髮減事發清機會有加餐日母令音信稀

伯璣豫章書至兼示湖隱近詩

江路頻通訊逾年得報書傍城成卧隱出戶即樵漁病裏詩能健貧來友不疎老夫漸老嬾差可賦郊居

寄周伯衡南州

三年猶旅食何日作歸人送老誰供酒看花好及春湖山寬客病林壑笑官貧北去如相問蕪江是近鄰

柏子菴

門陰鳴腳樹路接蟹山岑清磬晝長寂片雲晴自深烹茶邀過客遺飯飼飢禽見

說南郊叟時來倚杖吟

山門

在宣國縣石關成門中有諸洞其一為瞿硎先生石室

石扇開橫岫春陰過杳冥地寒雲樹古峰挾寺門青移杖分林洞流泉出戶庭前山看不極招手接瞿硎

鑿鐵菴

鐵壁看無路雙巖又石扉屋多憑地少棧轉觸雲飛暗裏深聞磬空中翠滿衣客遊情賞劇不擬住僧稀

懷梅季升用阮懷韻

梅尉風期遠菰蘆有此人驅愁甘就老力疾恥言貧舊釀牀頭盡殘書枕畔親扁舟通硤石誰復往來頻

汪舟次雨集泛舟紅橋

同劉公嚴唐耕鴻孫豹人程穆倩孫無言

出城通野艇鼓枻過名園只為論文友重開對雨尊亭臺緣浦澈雲樹接江村悵望平山路風流二老存

二

幾歲法曹去橋邊彥會稀

王阮亭理揚州有紅橋唱和集

湖山留畫舫耆舊老漁磯烟際水初合

雨中鶯不飛繁華烽火後楊柳又成圍

喜張鞠存吏部至

淮口何時到邗江慰索居不嫌音問少各訝髭毛疎生事餘叢桂青山滿舊廬老
來矜歲月別後著何書

寄張雲子

才健棄繻日詩傳入洛年飛揚看少壯棲託肯林泉臨浦山樓闥藏書石屋偏聽
歌重授簡回首憶離筵

送張九宣還秣陵兼憶陳少參

時九宣以陳書至

漫為宛水客不共敬亭遊夾岸看楓落孤帆帶雨秋交情存簡略詩思合窮愁數
息元龍老秦淮尚滯留

濮朗元過訪有贈

屏跡成疎懶荒園付草萊霜留殘菊在月照故人來共學看垂老論文敢負才鄰
家有斗酒杯取盡深杯

同里諸公集澄江亭

地有張尚書祠

素侶論交地寒潭百尺澄江山憐故舊雲樹得憑陵風起帆爭郭魚歸浦挂罾尚書遺跡在步屨肯相仍

二

謝李風流在吾儕復此邦清尊臨極浦皎月滿寒江葉落雁無數沙明鷗自雙宵分歌未歇何處曉鐘撞

送巴江李朗仙暫歸鍾離

歲晚歸人急天寒別恨賒留淮渾忘客憶蜀尚浮家野戍風中角江梅雪後花相如會乘傳萬里向三巴

元旦後二日雪晴

北樓山郭裏積雪晚晴時川白流漸水風迴凍雀枝獨吟開慢數飢寒覺烟遲父老爭占歲聲喧土穀祠

贈楊仲建

白首仍強飯清溪繞竹門花前來燕子雨後長龍孫勸客一尊滿藏詩幾卷存過

從為耆舊搖落不須論

偶至溪園看花

造次風花暖春光太遽歸繞看滿眼放誰促片紅飛身病閒難遂家園到亦稀行
當就幽興散髮掩荆扉

為馬雲人題澄江草堂

敬亭真在眼小築復臨流木榻攤書卷風簾進野鷗醉吟從獨往生事笑人愁隨
興閒相就門前有釣舟

舟中見新燕

時張菊水李朗仙
梅耦長同賦屬和

汝到知時節殷勤傍客槎街泥衝雨急逐伴掠谿斜烟寺初低柳江城半落花那
堪正寒食遊子又離家

二

春去關情甚重禁燕子催舊巢何處在滄海隔年來節序看蓬鬢乾坤剩釣臺江
皋憑悵望橫笛為誰哀

江關值顏修來儀部權滿將還

旅泊成良會相看又隔年獨吟收野老高興話林泉把酒江平檻還家書滿船經過洙泗在努力問前賢

過徐青溪寓園

幽棲就南園郭外自山村舊業烏衣散殘書草閣存倦遊成出處小摘稱饕餮留客偏泥飲還歸月在門

酬劉黎先

金陵讀書客江郭草堂人樓小烟波見庭閒花藥春論文先習靜取友故耽貧多恐秦淮別相思有夢頻

梅八大子翔卧病書來送別

力疾頻書札開緘淚滿襟憑詩扶老在恨別與愁深山雨落花夜江關孤客心相期各無恙藏酒待同斟

將入都酬何省齋

倦遊思遁跡垂老薄論詩惜別又千里開懷共幾時浮沈金馬地浩蕩海鷗期不是虞翻傲平生誰見知

徐州來宅同商賢

緩酌論文字江城此會稀
避人安獨嘯依水得清暉
春樹漁舟過晴雲客座飛
廿年小阮貴不改舊荆扉

胡國堂邀集畫舫即事

乘漲青溪曲回舟亦石磯
葵榴明野岸楊柳動江扉
目換名園接尊移莫鳥歸
平生為朋好力疾興難違

答商賢送別用韻

江水去不歇野雲諧我心
自慚成小草未許共長林
老覺名交累閒看歸計深
朱絃君自愛倘復有知音

酬郭汾又送別

郭蜀人流寓吳興

長干重會面雨坐寸心深
好占花谿住徒傷越客吟
岳遊雙屐在家遠二毛侵
聖代詞臣貴應無歎陸沈

半峰菴訪葉林屋

尋君出南郭古樹寒春山
高館就僧僻片雲留客閒
詩篇連几榻旅食老江關
不

共長千住何由數往還

黃俞邵書齋

耆舊白門少藏書黃氏多客應來李郭句好似陰何高坐向修竹古牆橫薜蘿奇編思借讀袞袞又虛過

貞壽詩介高母郭氏六十

郭江甯人十六歸處士高前基一夕而疾作遂異寢十日卒郭矢節奉姑以孝聞

苦節尋常事新婚恨獨深合歡雙淚眼一夕一百年心桃李當春落松筠耐雪侵重聞貞孝備感歎共沾襟

磨盤山

踏山作平地巍坂尚千盤疲馬踟躕過層峰出沒看風塵偏病眼驅迫豈微官自古長征客誰知行路難

徐州五日

河上天中節秦淮蕭鼓時道途過歲序風土薄蒲葵遇舊沽吳酒招魂倦楚辭轉

憐無競渡不起故園思

追和此瞻廣州見懷之作

時同被裁

同是還家客憐君滯粵城客塗五嶺盡瘴雨幾朝晴跡合行藏日才兼吏隱名得閒良不易各自愛平生

懷歙州王莪懷進士

時郡使君曹公相善

南宮通籍久林壑故淹留時遇宛陵使招余黃嶽遊藏書橫石榻種竹遶山樓送酒江州在杯乾倘不愁

贈胥任安麓菴

賦減官仍劇年荒驛更難不辭塵甑苦猶授故人餐京縣徵書早琴堂海氣寒憐君文字癖肯索近詩看

王考功西樵戶部阮亭先枉寓舍

倦客荆扉掩同心二妙來論文堪日落執手各顏開歲月東方米風沙郭隗臺誰知郎署地今有絕羣才

和沈康臣舍人歲暮喜得余書之作

舊好頻年隔相思伏枕餘寧知青瑣客苦憶素交書松火圍寒坐溪窗聞夜漁燕
吳各天末搔首一愁予

金長真汝寧書至兼寄所選何大復集

闕下羈棲日天中尺素來同曹成契闊竝馬舊追陪薄宦浮雲遠窮交暮景催品
詩推記室嗟爾善論才

得毛大可書

尚作梁園客生涯老奈何行吟徧嵩嶽歸夢遶黃河羈旅文章賤愁人道路多倦
遊應息駕吾亦返巖阿

與田子綸舍人

舍人詩思劇窮巷肯相過官冷金門貴心閒滄海多暗蟲催夕杵涼雨濯秋荷莫
厭飢方朔狂來據地歌

王阮亭雨中見過

世路塵中過交期物外親濕雲迴入幔連雨故留人篇翰供閒事關山驅客身知
音相藉在還往敢辭頻

次韻汪蛟門舍人見贈

急雨涼秋入孤雲向夕還
羈棲得枚馬詞賦共追攀
臺輦時趨陞耽書日掩關
猶煩解玉珮歎曲醉衰顏

二

論交真造次何處更相期
每踏昭亭路思君杖策時
病身從把釣野性愛烹葵
京洛千秋事憑詩記別離

雨宿壇院

杖藜成薄暮亭館坐忘歸
微雨洗山月白雲生客衣
松槐千樹合笙鶴九霄飛
自笑塵中老來遊此地稀

京邸夏杪宋荔裳宴王氏園林限韻四首

同曹爾菴陳說巖王西樵阮亭程周量許青嶼沈繹堂

客許南皮會園疑歷下亭
雨聲煩暑散樹影數家青
讌坐從疎密雲烟屬杳冥
解衣成永日城闕已郊坰

二

北窗高枕得野興復招尋
白首萍蓬客清樽湖海心
雲迷羅徑曲人語石堂深
莫

計升沈事涼風正滿林

三

漫言誰主客隨處即林塘
杯試仙槎古花連鳥几香
艱虞才不盡飛動意難忘
明

日攜春卷還來卧石牀

有銀槎杯元朱碧山所製

四

過雨疎簾捲輕雲入檻流
乾坤憐此夜河漢近新秋
旅病疲征馬歸心逐釣舟
祗應戀朋舊京雒暫淹留

遙和沈康臣曹頌嘉汪蛟門喬石林四舍人遲予未赴之作

在生者青嶼荔裳顧菴繹堂西

樵周量阮亭陶李

殘暑槐陰靜夕陽秋氣佳
故人兼上客曲宴復高齋
今古悲歌地風塵邱壑懷
如何良會隔獨夜坐空階

二

露坐從清夜長吟送濁醪
風騷成底用天地笑吾曹
倚檻星河出過橋山月高
招尋憐袞袞別路首重搔